



Inatsisartunut ilaasortaq
Mimi Karlsen
Inuit Ataqatigiit

Pineqartog: Innuttaasunik kiffartuussinissaq pillugu KNR-imut isumaqatigiissut

Asasara Mimi Karlsen

Angusassat pillugit KNR-imut isumaqatigiissut, aamma ulluinnarni taaneqartartog
"innuttaasunik kiffartuussinissaq pillugu isumaqatigiissut, pillugu apeqqutinnut qujanaq.
Apeqqutitit ataani akineqarput.

- 1) *KNR-ip tugasassiorfittut innuttaasunik kiffartuussisussatut
naammassisaqarnissamut isumaqatigiissutaa Naalakkersuisunit qaqugu
saqqummiunneqarsinnaava?*

Akissut: Aallaqqaasiullugu ilisimatitsissutigineqarsinnaavoq angusassat pillugit
isumaqatigiissutitip nutaap suliarineqarnissaa pillugu oqaloqatigiinnerit
aallartinneqarnikuusut, ilimagineqarporlu 2015-imi upernaap ingerlanerani taanna
isumaqatigiissutigineqassasoq.

Radiukkut tv-kullu aallakaatitsisarneq pillugu inatsisartut inatsisaanni nr. 7, 8. juni 2014-
immeersumi, § 57 naapertorlugu § 28, imm. 1-imi ersippoq piffissamut 1. januar 2015-
imiit 31. december 2018-imut angusassat pillugit isumaqatigiissut siullermik
nutarterneqassasoq. Aamma § 57-imut oqaaseqaatini ersippoq siunertaq tassaasoq
siulersuisut piffissaq qinigaaffiat malillugu sullissinissaq pillugu
isumaqatigiissusiortoqartassasoq.

Tamassuma saniatigut § 28, imm. 1, oqaaseqatigiinni kingullerni ersippoq
sullissinissamik isumaqatigiissut ukiunut sisamanut isumaqatigiissutigineqartassasoq.
Soorlu inatsimmi oqaaseqatigiinni ersittoq, isumaqatigiissutit assersuutigalugu 1. januar
2015-imi isumaqatigiissutigineqarsimanissaanik piumasaqaateqartoqanngilaq, tassa
inatsisini taamaallaat piumasaqaataamat isumaqatigiissut ukiunut sisamanut
atuutissasoq, isumaqatigiissutitip qaqugukkut atsiorneqarnera apeqqutaatinnagu.

- 2) *2014-mut aningaasanut inatsimmi paasissutissiissutigineqarpoq KNR-ip
Naalakkersuisullu akornanni tugasassiorfittut innuttaasunik kiffartuussisussatut
naammassisaqarnissamut isumaqatigiissutaa 1. januar 2013 - 31. december
2016-ip tungaanut atuuttussaq isumaqatigiissutigineqarsimasoq, tassanilu KNR-
ip aallakaatitsinissaanut akunnerit atugassat minnerpaaffilerneqarsimasut.
Isumaqatigiissusiortoqarsimangippat sooq taamatut paasissutissiisoqarpa?*

Akissut: Tamassumunnga pissutaavoq 2014-imut aningaasanut inatsisip ukiup
aningaasanut inatsiseqarfiusup siuliani suliarineqarnera – tassa 2013-imi. Taamanikkut

19-02-2015
Sags nr. 2015-111002
Dok. nr. 1869314

Postboks 1029
3900 Nuuk
Tlf: +299 34 50 00
Fax +299 32 20 73
Email: ikiin@nanoq.gl
www.nanoq.gl

siunertaavoq angusassat pillugit isumaqatigiissut piffissamut 1. januar 2013-imiit 31. december 2016-imut atuuttusaaq isumaqatigiissutigineqassasoq.

Kisiannili radiukkut tv-kullu aallakaatitsisarneq pillugu inatsit maannakkut atuuttoq Inatsisartut 2014-imi upernaakkut ataatsimiinnerminni akueraat, tassaniilu ilaatigut KNR-ip siulersuisuisa suliamik ilisimasaqartuunissaat isiginiarneqarpoq. Inatsisartut inatsimmi aalajangiipput siulersuisut nutaat inatsisip ulloq 1. august 2014 atuutilerana peqatigalugu sulinertik aallartissagaat, siulersuisullu nutaat piffissamut 1. januar 2015-imiit 31. december 2018-imut angusassat pillugit isumaqatigiissut nutaaq Naalakkersuisunut isumaqatigiissutigissagaat. 2014-imi ukiakkut Inatsisartunut qinersisoqassasoq nalunaarutigineqarpoq 28. november 2014-imi qinersisoqassasoq, tamassumalu kinguneraa angusassat pillugit isumaqatigiissut nutaaq pillugu siulersuisunut nutaanut aallarnisaalluni oqaloqatigiissutigineqarnissaata Naalakkersuisut nutaat toqqarneqarnissaannut aatsaat decemberimi 2014-imi pisumut kinguartittariaqarnera.

Taamaammat innuttaasunik kiffartuussinissaaq pillugu isumaqatigiissutip nutaap 2014-imi isumaqatigiissutigineqarnissaa tunngavissaaqarnikuunngilaq.

Aammattaaq ilassutigineqarsinnaavoq angusassat pillugit isumaqatigiissut nutaaq 2013-imi qaammatini siullerni isumaqatigiissutigineqarnikuunngitsaq, tamassumunngalu pissutaasimagunarpoq taamanikkut Naalakkersuisuisut Inatsisartunut qinersinissap 2013-imi ukiup affaani siullermi pisussap tamassumalu kingorna nutaanik Naalakkersuisoqalernissap utaqqimaarneqarnissaa naleqquttutut isigisimagaat. Tamanna KNR-ip ingerlatsineranut tamannalu pillugu politikikkut atugassaritineqartunut tunngatillugu piffissami isumaqatigiissusiorfiusumi siunissami ineriartortisinissatut kissaatigineqartoq aallaavigalugu angusassatut isumaqatigiissut qaqugukkulluunniit Naalakkersuisuisut KNR-illu akornanni isumaqatigiissutaanera tunngavigalugu isigineqassaaq.

Tamassuma saniatigut suliap suliarineqarneranut annikinngitsumik sunniutaavoq taamanikkut KNR-imi pisortaasup atorfinnimit ingerlaannaq tunuarnissamik kissaateqarnerminik KNR-imi siulersuisunut 2013-imi februarimi nalunaaruteqarnera, pisortarlun nutaap taamanikkut KNR-imi siulersuisuinit atorfinitsinneqartup ulloq 15. november 2013-imi sulilernerana.

- 3) *Tugasassiorfittut innuttaasunik kiffartuussisussatut naammassisaqarnissamut isumaqatigiissutip atuutinnginnerani KNR-i isumaqatigiissut kingulleq naapertorlugu pisussaaffilerneqarnermigut aallakaatitassiatigut suliassaminik naammassinnissimava?*

Akissut: Aallaqqaasiullugu erseqqissarneqassaaq KNR-ip suliassai aallakaatittagaalu pillugit piffissami pineqartumi inatsimmi piumasaqaatit suli tunngaviunikuusut, taakkulu radiukkut tv-kullu aallakaatitsisarneq pillugu Inatsisartut inatsisaanni maannakkut atuuttumi kapitali 4-imi taassumalu atuutilinnginnerani taamanikkut radiukkut tv-kullu aallakaatitsisarneq pillugu Inatsisartut peqqussutaanni nr. 6, 14. november 2004-mi taamanikkut atuuttumi allaqqapput.

Tamanna pillugu oqaatigineqassaaq KNR-imut angusassat pillugit isumaqatigiissutip nutarternissaanut tunngatillugu piffissap nikinganera siullunngitsaq. Tassunga tapiliullugu eqqaamaneqassaaq KNR-imut angusassat pillugit isumaqatigiissutip ukiup

aappaata affaani sooq nutarterneqarsimanginnera pillugu apeqqutit taamanikkut illit Naalakkersuisutut akisussaasutut 2010-mi aasakkut akisariaqarsimangitit.

Naggasiullugu oqaatigineqassaaq qitiusumik allaffissuup KNR-illu akornanni isumaqatigiissutigineqarnikuusoq piffissami pineqartumi angusassat innuttaasunik kiffartuussinissaq pillugu isumaqatigiissut kingulleq aallaavigalugu suliarineqassasut. Tassunga atatillugu ilassutigineqarsinnaavoq 2013-imut naatsorsuutit KNR-ip nassiunnikuugai, taakkulu angusassat pillugit isumaqatigiissutip malinneqarsimanera pillugu apeqqutip nalilersornissaanut atorneqarsinnaapput. Tassani ersippoq KNR meeqqanut inuusuttunullu aallakaatitassianik arlalinnik, nutaarsiassanik piffissanilu aalajangersimasuni pisunik aallaakkaatitassianik arlalinnik, ilinniartitsineq peqqinnissarlu pillugit aallakaatitassanik arlalinnik aallakaatitsinikuusoq, kisiannili eqqumiitsuliorneq kulturilu pillugit aallakaatitassatut isumaqatigiissutigineqartunit ikinnerusunik aallakaatitsinikuusoq. Tassunga peqatigitillugu kisitsisini ersippoq KNR isumaqatigiissutigineqartunit tiiminik katillugit 34-nik ikinnerusunik aallakaatitsinikuusoq. Tamanna tunngavigalugu 2013-imut angusassatut isumaqatigiissutigineqartunik KNR-ip eqqortitsisimaneranut tunngatillugu amigaatinik uparuaanissaq pisariaqartinneqarnikuunngilaq. Tassunga peqatigitillugu ilisimatitsissutigineqarsinnaavoq 2014-imut kisitsisinik Naalakkersuisut suli tigusaqarnikuunngitsut, ilimagineqarporli 2013-imi kisitsisinut sanilliullugu annertunerusumik allaassuteqassanngitsut.

- 4) *Tugasassiorfittut innuttaasunik kiffartuussisussatut naammassisaqarnissamut isumaqatigiissut amigaatigineqartoq Nunap karsianut sunniuteqassava (iml. sunniuteqarsimassava?) Taamaassimappat sutigut?*

Akissut: Angusassat pillugit isumaqatigiissutip nutarterneqannginnera Nunap Karsianut kinguneqarsimangilaq aammalu kinguneqarnissaa ilimagineqarani.

- 5) *Tugasassiorfittut innuttaasunik kiffartuussisussatut naammassisaqarnissamut isumaqatigiissut amigaatigineqartoq KNR-ip aningaasaqarneranut sunniuteqassava (iml. sunniuteqarsimassava?) Taamaassimappat sutigut?*

Akissut: Angusassat pillugit nutaamik isumaqatigiissuteqarsimanginnerup KNR-ip aningaasaqarneranut sunniuteqarsimangilaq aammalu sunniuteqartussaananani.

Inussiarnersumik inuulluaqqusillunga



Nivi Olsen